

LASARTE-ORIAKO PLANGINTZA
URBANISTIKORAKO AHOLKU-
BATZORDEA ARAUTZEKO
ERREGELAMENDUA

ZIOEN AZALPENA

Erregimen Lokaleko Oinarrien Legeko 69. artikulua araber, Korporazio Lokalei dagokie beren jardunari buruzko ahalik eta informaziorik zabalena herritarren eskura jartzea eta, halaber, herriko bizitzan parte har dezaten erraztea ere.

Hirigintzakoko gaietan, Euskadiko Lurzoruari eta Hirigintzari buruzko 2/2006 Legeak, bere 108., 109. eta 110. artikuluetan, informatzeko eta parte hartzeko eskubidearen beste tresna tradizional batzuk garatuz, Plan Orokorren ordenazio estrukturala lantzean eta hari aldaketak egitean herritarrek parte hartzeko programa espezifiko bat aurreikustea exijitzen du eta, bestalde, beren plan orokorrak behin betiko onesteko eskumena duten udaletan Udal-Plangintzako Aholku-Batzorde bat era egokian sortzera eta arautzera obligatzen du. Aholku-Batzordeak, eztabaidarako eta aholkuak emateko organo lokala delarik eta hirigintzako planak gizartean itun daitezten ahalbidetzeko xedea duelarik, entitate lokalari hirigintzaren antolamendurako oinarrizko tresnak formulatzen eta onesten laguntzea du helburu; eta, zehazkiago, Hiri-Antolamendurako Plan Orokorreko zehaztapenez den bezainbatean.

Prestatu den Erregelamendu Lokalak, bere xedapenak arautzeko orduan, gehienbat bilatu duena hainbat agenteren arteko kontzertazio desiragarria, koordinazioa eta, batez ere, hirigintzaren antolamenduari buruzko udalaren bihar-etziko erabakien orientabidean parte hartzea izan da.

Helburu horrekin, Lasarte-Oriako Udalak, Erregelamendu honen bidez, Lasarte-Oriako Udalerriaren Plangintzarako Aholku-Batzordearen sorrera eta funtzionamendua arautzea proposatzen du, kide anitzeko eta eztabaidarako organo aholku-emaile gisa, zeinek ahalbidetuko baitu gizartearen parte-hartzea indartzea hirigintza planifikatzen eta udalerriaren garapen iraunkorra artikulatzen eta bultzatzen.

Erregelamendu honen bidez zehazten diren beste aspektu batzuk dira, halaber, Udalerriaren Plangintzarako Aholku-Batzordearen oinarrizko egitura, funtzioak, epeak eta erregimen juridikoa, betiere Erregimen Juridiko eta Prozedura Administratibo Komunari buruzko 30/1992 Legearen 22.2 artikuluan ezarritako kide anitzeko organoen izaera duela kontuan izanik.

Lurzoruari eta Hirigintzari buruzko 2/2006 Lege ekainaren 30ekoaren 110. artikuluan xedaturikoaren araber, honako erregelamendu hau ematen dugu:

LASARTE-ORIAKO UDALERRIAREN PLANGINTZA URBANISTIKORAKO AHOJKU-BATZORDEA ARAUTZEKO ERREGELAMENDUA

I. KAPITULUA

Plangintza Urbanistikorako Aholku-Batzordearen izaera eta eginkizunak

1. artikulua.- Plangintza Urbanistikorako Aholku-Batzordearen sorrera.

1. Euskal Autonomia Erkidegoko Lurzoruari eta Hirigintzari buruzko 2/2006 Lege ekainaren 30ekoak 110. artikuluan xedaturikoaren arabera, honako Erregelamendu honen bidez sortzen eta arautzen da Lasarte-Oriako Plangintza Urbanistikorako Aholku-Batzordea, herritarren parte-hartzearen printzipio orokorraren bermagarri.

2. Udalerrriaren Plangintza Urbanistikorako Aholku-Batzordea eztabaidarako eta aholkuak emateko organoa lokal bat da, eta kontzertazio sozialeko eginkizunak betetzeko sortu da, Lasarte-Oriaren estruktura antolatzeke planak nahiz Araudiak aurreikusten dituen gainerakoak formulatzeko, tramitatzeke eta onesteko prozedurari dagokionez.

2. artikulua.- Adskripzioa.

Udalerrriaren Plangintza Urbanistikorako Aholku-Batzordea hirigintzaren gaietan eskumena duen udal-atalari adskribitzen zaio.

3. artikulua.- Izaera Juridikoa.

Udalerrriaren Plangintza Urbanistikorako Aholku-Batzordea kide anitzeko organo moduan eratzen da, Administrazio Publikoen Erregimen Juridikoari eta Prozedura Administratibo Komunari buruzko 30/1992 Legearen 22. artikulutik 27.era artekoetan arautzen direnen arabera.

4. artikulua.- Funtzioak.

1. Udalerrriaren Plangintza Urbanistikorako Aholku-Batzordearen egitekoa izango da honako funtzio hauek betetzea:

- a) Udalak hiri-plangintza orokorraren arloan egingo dituen azterlanen, programen, gidalerroen eta jardun-ildoen berri izatea, horiek prestatzen laguntzeko, bai halaber horiei buruzko txostenak ematea, behin plan orokorraren idazketa teknikoa abiatutakoan.
- b) Plangintza orokorreko zehaztapenei buruz beste instantzia batzuetatik Udalari berak azter ditzan planteatzen zaizkion ekimenak, iradokizunak, alternatibak edo proposamenak aztertzea.

- c) Hirigintzaren antolamendurako beste edozein plan edo tresnaren berri galdetzea, jakitea eta txostena egitea, baldin eta Udalak hala eskatzen badu edota Aholku-Batzordeko kideen gehiengo osoak hala eskatzen badu.
2. Aholku-Batzordearen esku-hartzea bere kontsideraziopean hartzen dituen gaiak aztertzeke agirietan eta txostenetan egikariturako da, eta horietan proposamen edo alternatiba ez-lotesleak jaso ahalko ditu udal-gobernuko organoentzat.
 3. Plangintza Urbanistikorako Aholku-Batzordeak Udalari aurkezturiko proposamen edo alternatibak, baldin eta aintzat hartu ez badira dagokien dokumentu urbanistikoa behin betiko onesteko ebazpenean, arrazoiak adieraziz erantzun beharko ditu Udalak.

5. Artikulua.- Txostenak egitea.

1. Udalerriaren Plangintzarako Aholku-Batzordeak nahitaez eman beharko du irizpena Antolamenduko Plan Orokorra eta hirigintzaren egiturazko antolamendurako bestelako tresnak lehen aldiz formulatzeko espedienteetan, horiek guztiz edo partzialki errebisatzekeotan edo horietan aldaketa puntualak egitekeotan.
 - a) Lehen formulazioari dagozkion espedienteetan, edo Plan Orokorraren, Sektorizazioko Planaren edo Konpatibilizazioko Planaren errebisio osoari nahiz partzialari dagozkienetan, Udalerriaren Plangintzarako Aholku-Batzordeak nahitaez eman beharko du txostena aurrerapen-dokumentuaren edukiari buruz.
 - b) Plan Orokorraren, Sektorizazioko Planaren edo Konpatibilizazioko Planaren aldaketa puntualari buruzko espedienteetan, nahitaezkoa izango da informazio publikorako jarriko den lehenbiziko dokumentuaren edukiari buruzko txostena ematea.
2. Era berean, Aholku-Batzordeak, hango kideen gehienezko kopuruaren erabateko gehiengoak hala erabakitzen duenean, hirigintzaren antolamendurako bestelako plan edo tresnen berri galdetu ahalko du bere txostenerako, eta horien berri eman.
3. Aholku-Batzordeak Plangintzaren Aurrerakinaren informazio publikorako epean egin beharko ditu nahitaezko txostenak; eta, Aurrerakinaren dokumenturik tramitatuko ez bada, hasierako izaeraz onetsiriko dokumentuaren informazio publikorako epean. Edozein kasutan ere, ezarritako epeetan txostena ez egiteak espedientea tramitatzen jarraitzeke eskumena emango die hura onesteko

erantzukizuna duten udal-organoei, eta epez kanpo aurkeztu liratekeen txostenen edukia kontuan ez hartzeko aukera izango dute behin betiko onespena emateko ekitaldian. Alkateak, Aholku-Batzordeko kideen gehiengo osoak hala eskatuz gero, eta alde zuzenetik arrazoiturik, zabaldu egingo du txostenak egiteko epe hori.

II. KAPITULUA

Plangintza Urbanistikorako Aholku-Batzordearen osaera

6. artikulua.- Osaera.

1. Honako hauek dira Plangintzarako Aholku-Batzordea osatuko duten kideak, mintzatzeko eta bozkatzeko eskubidearekin:

- Lehendakaria: Udaleko Alkatea, zeinek Udalbatzako edozein zinegotzirengan delegatu ahalko baitu lehendakaritza efektiboa.
- Lehendakariordea: Hirigintzako Batzordeko lehendakaritza bere gain daukan zinegotzia.
- Bokalak
 - Ingurumeneko Batzordeko lehendakaria.
 - Udalbatza osatzen duten talde politikoetako zinegotzi bana.
 - Legez eraturiko auzo-elkarteetako ordezkari bana, gehienez ere 4.
 - Legez eraturiko elkarte ekologista edo ingurumenzale bateko ordezkaria.
 - Desgaituen Elkarteko ordezkari bat.
 - Agenda 21 Lokalaren Foroko ordezkari bat.
 - Merkatarien elkarteetako ordezkari jardungo duen kide bat.
- Aholku-Batzordearen bilkuretan ahokulari moduan parte hartuko dute, mintzatzeko eskubidearekin baina ez bozkatzeko, Obretako, Hirigintzako eta Hiri-Kudeaketako Batzorde Munizipalean parte hartzen duten teknikari munizipalek eta aholkulariek, bai eta, kasua hala bada, Alkatetza-Lehendakaritzak izendatzen dituenek ere. Horiek mintzatzeko eskubidea izango dute, baina ez bozkatzekoa.
- Aholku-Batzordeko idazkaria Hirigintzaren arloan eskumena duen departamentuko udal-funtzionario arduraduna izango da, edo funtzionarioa zeinengan delegatzen duena. Idazkariaren egitekoa

izango da, betiere lehendakariaren zuzendaritzapean, Aholku-Batzordea urgaztea eta aholkatzea.

- 2.- Lehendakariak, lehendakariordeak edo batzordekide bokalen herenek hala proposatuz gero, Aholku-Batzordearen bileretan partaide izan ahalko dira, aholkulari moduan, mintzatzeko eskubidearekin baina ez bozkatzekoarekin:

–Hirigintzako planak idazteko ardura duten teknikariak.

–Hirigintzaren eta Ingurumenaren arloan prestigio aitortua duten pertsona adituak.

- 3.- Udalerriaren Plangintzarako Aholku-Batzordeko kideak alkateak izendatuko ditu, dekretu bidez, eta horren berri emango zaio Udalbatzarrari.
- 4.- Lasarte-Oriako Udalerriaren Plangintzarako Aholku-Batzordea hango kide guztiek osatuko dute, mintzatzeko eta bozkatzeko eskubidearekin.
- 5.- Parte hartu nahi duten entitateek beren sektoreen barruko ordezkariak proposatu ahalko dituzte, eta batzordekide izendatuak izango dira, betiere proposamen hori aho batez formulatu badute; beste gainontzean, errepresentagarritasun eta egokierako irizpideei erreparatuko zaie, aldeaz aurretik udaleko taldeei kontsulta eginda.

Erregelamendu hau PAOn argitaratzen den dataren hurrengo 15 egunen barruan, aurrekontu artikuluan aipaturiko elkarte eta entitateak Alkatetzari zuzenduko zaizkio, Udaletxeko Erregistro Orokorrean aurkezturiko idatziaren bitartez Aholku-Batzordean parte hartzeko eskatuz.

- 6.- Emakume eta Gizonen Berdintasunerako 4/2005 Legean erabakitakoaren arabera, Plangintzarako Aholku-Batzordeko kide izango diren pertsonak hautatzeko eta izendatzeko orduan, presentzia orekatua izaten saiatu beharko da trebakuntza, gaitasun eta prestakuntza egokia duten emakume eta gizonen artean. Errepresentazio orekatua dagoela joko da sexu bakoitzeko ordezkariak gutxienez ere % 40 denean.

III. KAPITULUA

Udalerriaren Plangintzarako Aholku-Batzordeko kideen Estatutua.

7. artikulua.- Batzordekide izatea.

1. Behin Alkatetzako Dekretuaren bidez izendatuak izan direnean, Aholku-Batzordeko kideek izaera horri dagozkion eskubideak izango dituzte eta izaera horri dagozkion betebeharrak bete beharko dituzte.
2. Postu bakoitzerako titular bat eta ordezeko bat izendatuko dira.
- 3.- Udalerriaren Plangintzarako Aholku-Batzordeko kideek izaera hori galdu egingo dute kausa hauengatik:
 - a) Heriotzagatik edo ezintasunagatik, betiere ezintasuna epailearen erabaki irmoaren bidez deklaratu bada.
 - b) Epea iraungitzean udaleko agintaldia agortzeagatik; horrek, ordea, ez du eragotziko beren funtzioetan jarrai dezaten, administrazio arrunterako bakarrik, harik eta ondorengoak izendatzen dituzten arte. Kausa hori aplikatzekoa izango zaie bai Udalbatzako kideei, bai elkarteetako ordezkari.
 - c) Dimisioagatik edo borondatezko errenuntziagatik, zeina idatziz aurkeztu beharko baitzaio Batzordearen Osokoari.
 - d) Udaleko zinegotzi kargua uzteagatik edo borondatez uko egiteagatik, Udalbatzarraren Osoko Bilkurak aintzat hartu badu.
 - e) Zeinengatik hautatua atera zen elkartearen kargua uzteagatik.
 - f) Ordezkatzen duten elkartearen taldea edo kolektiboa desegiteagatik.
 - g) Elkarrearen estatutuaren funtsezko aldaketa egiteagatik eta, horren ondorioz, haiengatik izendatuak izan ziren irizpideak ere aldatzeagatik.
 - h) Erregelamendu honetan adierazitako egitekoak eta betebeharrak behin eta berriz ez betetzeagatik, Aholku-Batzordeko kideetako hiruk gutxienez hala proposaturik.
4. Batzordekide-izaera galtzearen berrespena Aholku-Batzordeko Osoko Bilkurak egingo du «e, f, g» eta «h» letretako kasuetan. Kasu horietan, hurrengo 30 egunen barruan beste norbait izendatuko da, Erregelamendu honetako artikuluan xedaturikoaren arabera.

8. artikulua.- Eskubideak

Honako hauek dira Batzordeko kideen eskubideak:

- a) Batzordeak egiten dituen osoko bilkura guztietara joatea eta parte hartzea.
- b) Batzordearen Osoko Bilkurak emandako txostenak betetzeko helburuarekin egiten diren jardueren berri izatea.

- c) Batzordeko aktak eta agiriak eskuratzeko aukera izatea.
- d) Batzordearen esparruan ekimenak eta interesak aurkeztea eta defendatzea.
- e) Batzordearen bilkuretan parte hartzea mintzatzeko eta bozkatzeko eskubidearekin.
- f) Korporazioaren zerbitzuen esku dagoen eta proposamen bat garatzeko beharrezko zaion informazioa eskatzea Batzordearen bidez.
- g) Erregelamendu honen arabera edo indarrean dagoen eta aplikakizun zaion legediaren arabera esleiri dakizkiekeen gainerakoak.

9. artikulua.- Betebeharrak

Batzordeko kideen betebeharrak dira:

- a) Osoko bilkuretan parte hartzea, Batzordeak bultzaturiko jardueretan laguntzeaz gain.
- b) Batzordea hobeto garatzen eta sustatzen laguntzea.
- c) Batzordearen izenean inola ere ez aritzea horretarako baimen espresik ez badu.
- d) Erregelamenduan jasotakoa errespetatzea eta betetzea.
- e) Elkarte, talde edo kolektiboen kasuan, Udalari hurrengo zertzelada hauetariko edozein jakinaraztea:
 1. Zeinengatik hautatua izan zen elkarteko kide izateari uztea.
 2. Ordezkatzen duten elkarte, taldea edo kolektiboa desegitea.
 3. Eta ordezkatzen duen entitate edo elkartearen estatutuetan egindako aldaketak.
- f) Erregelamendu honen arabera edo indarrean dagoen eta aplikakizun zaion legediaren arabera esleiri dakizkiekeen gainerakoak.

10. artikulua.- Kalte-ordainak

Aholku-Batzordeko kideek ez dute beren funtzioak betetzeagatik inolako ordainsaria jasotzeko eskubiderik izango.

IV. KAPITULUA

Aholku-Batzordearen antolamenduaren estruktura

11. artikulua.- Organoak.

Udalerriaren Plangintzarako Aholku-Batzordearen funtzionamenduko organoak honako hauek dira:

- a) Lehendakaritza eta Lehendakariordetza.
- b) Osoko Bilkura.

12. artikulua.- Aholku-Batzordearen lehendakaritza.

1. Udalerriaren Plangintzarako Aholku-Batzordearen lehendakaritza Udaleko Alkateari egokituko zaio.

Baldin eta lehendakaria ez badago, edota hark lehendakaritza espresuki delegatzen badu, lehendakariordeak beteko du kargu hori.

2. Lehendakaritzari dagozkio honako funtzio hauek:

- a) Batzordearen eskumenen esparruan indarrean dagoen legedia beteko dela bermatzea.
- b) Batzordearen helburuak beteko direla ziurtatzea.
- c) Batzordearen osoko bilkurak hartzen dituen erabakiak beteko direla arduratzea.
- d) Aholku-Batzordearen ordezkari jardutea instituzioetan, entitateetan eta batzordeetan, ordezkaritza hori Aholku-Batzordeko kide batengan delegatu ahalko duelarik.
- e) Bilkura arrunt eta berezien deialdiak erabakitzea eta bilkurako aztergaien zerrenda zehaztea.
- f) Batzordearen Osoko Bilkurak onesten dituen eskari, errekerimendu eta jarduketa guztiak dagokien udal-organoari bideratzea.
- g) Aztertuko diren gaien arabera, egoki deritzen pertsonak gonbidatzea Aholku-Batzordearen Osoko Bilkurara, mintzatzeko eskubidearekin baina ez bozkatzekoarekin.
- h) Aholku-Batzordeko lehendakari izateari berez dagozkion funtzioak betetzea.
- i) Eslei lekizkiokeen beste gainerakoak.

3. Aholku-Batzordearen bilkuretan, lehendakariaren eskumenekoak izango dira:

- a) Bilkuretako buru izatea, debateak moderatzea, bilkuretan zehar ordena mantentzea eta, beharrezko kasuan, bilkurak etetea, betiere arrazoiak justifikatuak badira.
- b) Botazio batean berdinketa gertatuz gero, kalitatezko botoaren bidez erabakitzea.

13. artikulua.- Aholku-Batzordearen Lehendakariordetza.

1. Lehendakariordetza Hirigintzako zinegotziari egokituko zaio. Hura ez badago, edo hark espresuki delegatzen badu, Korporazioko zinegotzi batek beteko du haren funtzioa.
2. Haren eginkizun funtsezkoena lehendakaria ordeztzea izango da hura bere kargua betetzen ari ez denean, kargua betetzeke dagoenean edo gaixorik dagoenean.

14. artikulua.- Aholku-Batzordearen Osoko Bilkura.

1. Udalerriaren Plangintzarako Aholku-Batzordearen Osoko Bilkura Erregelamendu honetako seigarren artikuluan aipatzen diren kide guztiek osatuko dute, bai halaber Aholku-Batzordeko Idazkaria, zeina mintzatzeko eskubidearekin baina bozkatzekorik gabe joango baita bilkuretara, eta Alkate-Presidentea izango da bilkuren buru.
2. Osoko Bilkura da Batzordearen erabaki-organo gorena, eta hurrengo eskudantzia hauek dagozkio.
 - a) Batzordearen lan-programa prestatzea eta lehentasun-ordena bat ezartzea bere jarduketetan.
 - b) Haiengatik bilkurarako deialdia egin zaion aztergai guztiei buruzko iritzia ematea.
 - c) Hala badagokio, Osokoaren aurreko bilkuraren akta onestea, eta deialdian sartzeko interesgarriak diren aztergaiak proposatzea.
 - d) Udalerriaren Plangintza Orokorraren formulazioan lantzen edo ezartzen diren estudio, programa, gidalerro eta jardun-ildo guztien berri galdetzea eta jakitea, plangintza hori prestatzen laguntzeko.
 - e) Aintzat hartzen dituen gaien analisiko agiriak egitea, izaera ez lotesleko proposamenak edo alternatibak aurkeztu ahalko dituelarik.
 - f) Bere eskumenen esparruan Udaleko Gobernu-Organoei eskatzen dizkieten estudioak egitea.

15. artikulua.- Aholku-Batzordearen idazkaritza.

Aholku-Batzordeko Idazkariak, lehendakariaren zuzendaritzapean, honako funtzio hauek beteko ditu:

- a) Osoko Bilkurarako deialdiak bideratzea eta horiekin batera bidaltzea bilkurako aztergaien zerrenda eta aurreko bilkurari dagokion akta.
- b) Aholku-Batzordearen Osoko Bilkuretara joatea, bilkuren aktak egitea eta lehendakariarekin batera aktak sinatzea.
- c) Artxiboko eta erregistro funtzioak betetzea, bai halaber bere karguari berez dagozkion guztiak.

V. KAPITULUA

Funtzionamenduko Erregimena

16. artikulua.- Bilkurak

1. Aholku-Batzordearen Osokoak bilkura arruntak egingo ditu bere funtzioak —laugarren artikuluan ezarritakoak— betetzeko behar den aldiro, eta bilera bereziak, behar den aldi guztietan Lehendakariaren proposamenez, dela bere ekimenez, dela Aholku-Batzordeko kideen gutxienez herenek hala eskatuta.

17. artikulua.- Asistentzien quoruma.

1. Bilkurak, deliberazioak eta erabaki-hartzeak lehen deialdian baliozko eran egiteko, beharrezko izango da bertan izatea Lehendakari eta Idazkari karguak betetzen dituzten pertsonak, edo zeinengan delegatzen duten pertsonak edo haien ordezkariak, bai halaber Aholku-Batzordearen Osoko Bilkurako kideen erdiak gehi bat gutxienez, eta quorum hori bilera osoan zehar mantendu beharko da.

18. artikulua.- Bilkuretarako deialdiak eta bilkurak egitea.

1. Halako bilkuretan non Aholku-Batzordeak nahitaezko txostena eman behar duen, bilkurako deialdia Aurrerakinaren informazio publikoa hasi aurretik egin beharko da, edo, quorumik ez bada, hasierako izaeraz onetsitako dokumentuaren informazio publikoa hasi aurretik, eta, betiere, bilkura egingo den eguna baino hamar egun balioudun lehenago egin beharko da.

Deialdiko agiriarekin batera, bilkurako gai-zerrenda ere helaraziko da. Bilkurako aztergaien zerrendan ageri diren gaietarako buruzko informazioa epe berean egongo da Aholku-Batzordeko kideen eskueran.

2. Aholku Batzordeko lehendakariak, bere ekimenez, edo batzordeko kide diren pertsonetarik edozeinek hala eskaturik, proposatu ahalko du, urgentziazko izaeraz eta haren gaineko deliberazioari ekin aurretik, aztergaien zerrendan sartu gabeko beste edozein gai sartzea.

Hala ere, ezingo da deliberaziorik egin edo erabakirik hartu aztergaien zerrendan sartu gabeko ezein gaiez, salbu eta Aholku-Batzordeko kide guztiak presente badira eta gaiaren urgentzia deklaratzeko bada gehienek aldeko botoz.

19. artikulua.- Lekua eta aktak.

Aholku-Batzordearen bilkurak Udaletxeko egoitzetan egingo dira, eta bilkura horietako bakoitzaren akta egingo du Aholku-Batzordeko Idazkaritzak. Akta horiek batzordekideei helaraziko zaizkie, eta egiten den hurrengo bilkuran erabaki beharko da ea onesten den.

Aktan jaso beharko da:

- a) Lekua, eguna eta ordua.
- b) Lehendakariaren eta bildutako kideen izen-abizenak.
- c) Bilkuraren izaera arrunta edo berezia.
- d) Deliberazioen eta kideen iritzi eta/edo proposamen guztien laburpena.

20. artikulua.- Erabakiak hartzea.

1. Aholku-Batzordearen erabakiak bilkurara etorritakoen gehiengo soilez hartuko dira. Berdinketa gertatuz gero, lehendakariak kalitatezko botoa emango du. Edozein kasutan ere, boto partikularrak eman ahalko dira, eta ados ez dauden alderdiek planteaturiko objekzioak idatziz jaso.
2. Hartutako erabakiak Aholku-Batzordeko idazkariak egingo duen aktan jasoko dira, eta akta hori aztergai den hirigintzako espedientearen parte izango da.

21. artikulua.- Aholku-Batzordea desegitea.

Udalerriaren Plangintzarako Aholku-Batzordea osoko bilkuraren erabakiz desegingo da, indarrean den legediaren arabera.

22. artikulua.- Medioen adskripzioa.

Hirigintzaren arloan eskumena duen eta Aholku-Batzordea adskribitua geratzen zaion udal-sailak jarriko ditu batzordearen funtzionamendu egokirako beharrezko diren bitartekoak.

LEHENENGO XEDAPEN GEHIGARRIA

Erregelamendu honetan espresuki aurreikusten ez den guztian, Administrazio Publikoen Erregimen Juridikoaren eta Prozedura Administratibo Komunaren 30/1992 Lege azaroaren 26koaren II. Tituluko II. Kapituluaren xedatutakoaren araberrako funtzionamendua eta jardunbidea izango ditu Udalerriaren Plangintzarako Aholku-Batzordeak. Gainerako xedapenetan, ordezkio izaeraz aplikatzekoa Erregimen Lokaleko Oinarriak arautzen dituen 7/1985 Lege apirilaren 2koan eta Entitate Lokalen Antolamenduko, Funtzionamenduko eta Erregimen Juridikoko Erregelamenduan (2568/1986 Errege-Dekretua, azaroaren 28koa) ezarritakoa izango da.

BIGARREN XEDAPEN GEHIGARRIA

Erregelamendu honetan ezarritakoa aplikatzeko eta garatzeko beharrezko diren instrukzioak emateko ahalmena ematen zaio Aholku-Batzordeko lehendakariari.

ALDI BATERAKO LEHEN XEDAPENA

Aholku-Batzordearen txostena behar duten espedienteek, Erregelamendua indarrean jartzean hasierako izaeraz onetsiak badaude, txostena beharko dute behin-behineko onespina eman aurretik.

Aholku-Batzordearen txostena behar duten espedienteek, Erregelamendua indarrean jartzean behin-behineko izaeraz onetsiak badaude, dute haren txostenik beharko.

AZKEN XEDAPENA

Erregimen Lokaleko Oinarriak arautzen dituen 7/1985 Lege apirilaren 2koak 70.2 artikuluan xedatzen denaren arabera, Erregelamendu hau bere edukia Gipuzkoako Lurralde Historikoaren Aldizkari Ofizialean oso-osorik argitaratu eta 15 egun balioduneko epea igarotakoan jarriko da indarrean.

DILIGENTZIA: Neuk egin dut, Udal honetako Idazkari Nagusiak, jasoa geradadin honako Araudi hau behin betiko onartua izan dela 2008ko abuztuaren 20ko Alkatearen Ebazpenez.

Lasarte-Orian, 2008ko abuztuaren 20an.

Idazkari Nagusiak,